

*Acta ofte handelingen des provinciael synodi
der kercken dieses furstendombs Gelre ende graeff-
schaps Zutphen, gehalden binnen Nijmegen den
6, 7 und 8 Junij anno 1582.*

1. In den eersten sijn nae aenroepinge des naemens Goeddes tot eenen praeside mit gemeinen stemmen vercoeren JOANNES CEPORINUS und tot einen assessore PETRUS GELLIUS FABER, tot eenen scribam JACOBUS ELDENIUS.

2. Volgens zijn verlesen die articulen des lestgehaldenen nationaell sijnodi tot Middelburgh, welcke der sijnodus voor recht und dem woort Godes gleichformicht sijn erkent und geapprobiert heeft, welcke alle diener deses furstendombs onderschrieven und soo viell moeglich naevolgen sullen. Und om tot eene alsulcke richtige ordeningh in desen furstendomb te coemen, ist mit gemeinen stemmen ordoniert als volgt:

1. Irstlick diewiell die arme huijsluijdt op den dorperen deses furstendoms Gelre ende graeffschap Zutphen entweder gantz sonder eenige leher des godtlicken woortz sitten ofte noch in der Papistischen superstition durch ihre alte vermeinten pastoren gehalten, und alsoo die arme luijden jemerlick an oirer zielen heill und salicheit versuijmt werden, ist raedtsam bevonden, dat van wegen des sijnodi aen stadtholder, cantzler und rhaeden aengehalden werde om aen die amptluijden respective toe schrieven und toe befeelen, dat sij die vermeinte pastoren op den dorperen daertoe hielden, dat sij in den classe, daeronder sij gehoeren, op versoecken desselven sich verfuegen und mit den dienaeren desselven classis van die lher und andere puncten der religion communiceren om sie alsoo tot die reformation toe brengen, angesehen die algemeine visitation, in den sijnodo tot Arnhem beratslaeget, tot noch toe den gewunsten voortganck niet gewonnen heeft.

2. Dat oock die Beghijnen tot dem gehoer des woorts gebracht muchten werden und haere superstitionen onderlaeten, sal men bij den magistraten der steden aenhalden, dat nijemandt van denselven, noch in den cloesteren zijnde, van den paters ofte matersen ofte imant anders van den predigen affgehalden werde. Und umb den magistraten in den steden hiertoe te bewegen, weere guet, dat een generall mandat in den ganschen furstendomb hiervan gedaen wurde. Sal men insgelijcken bij der overheit aenholden, dat die papistische henck ofte neffensschoelen in allen steden dieses furstendoms affgesteld mochten worden, gelijk in dem sijnodo, tot Aernhem gehalten, oock besloeten is gewesen, und dat men an stat derselven alsolcke schoelen van knechtsiend und metiens aenstelle, daerin die jeucht neffens leesen, schrieven und reekenen oock in den christlickeren Catechismo onderwesen wurde.

3. Alsoo men bevindt, dat veele kerckendienaers in diesen furstendomb mit onderholt und huijsinge noch niet versien sijn, sal men van wegen deses sijnodi bij stadtholder, cantzler und raeden aenhalden omb die versieninge te doen laeten, dat een ijgelicken kerckendienaer een eerlicke, richtige und seecker jaerlix onderholt gegeven und bequaeme habitation gewesen werde, und die behuijsingen der kerckendienaeren, die nu vast vervallen sijn, van den kirchenguederen nootwendich repariert und die kirckendienaer hiermit niet beswaert moegen werden.

4. Aengesien die kerckengueder, geistlicke probente undt beneficia, oock alsulcke, die tot den kerckendienst expresse gehoeren, meerdeels vergeven sindt und noch daegelix van den collatoren ofte patronen derselven gegeven werden aen diegenighe, die der kercken niet dienen ofte noch in lange tijt niet dienen kunnen, daerdoor dan geschiet, dat die dienaers, die tegen-

woordich den dienst verrichten, niet betaelt en werden und te besorgen staet, dat die kercken und schoelen dieses landts van wegen mangell und entfremdongh derselven guederen gans vergaen sullen, insonderheit daer dieselve beneficia ad vitam gegeven werden, sal men bij onsen genedigen heeren cantzler und raeden anholden und bidden, dat U. G. und E. wullen daeraen sijn, dat die kercken und cloistergueder dieses furstendoms Gelre ende graefschap Zutphen niet van den rechten bruick, daertoe sij gestift sindt, affgewendet ofte in privatos usus convertiert werden, und dat die beneficia ecclesiastica conferiert moegen werden dengenigen, die tegenwoordich den kercken und schoelen dienen, opdat die sacrilegia und abusos der kerckengoederen vermijdet, die tegenwoordige kerckendiener des toe beter betaelt und in kompstigen tijden den kercken und schoelen dieses landts erhalten moegen werden.

5. Und om in kompstigen tijden praedicanten und schoelmeister te bekommen und alsoo die wacre religion in diesen landt toe erhalten, sullen alle kerckendienaer bij haere magistract neerstich aenhalden, dat zij etliche jungen gesellen bekommen, die sij in studiis onderhouden om in kompstigen tijden den kercken ofte schoeldienst te bedienen.

6. Aengesien dat in den kercken deses furstendoms viell und mannigerleij saecken voorfallen, diewelcke van den Hoeve van Gelderlandt mutten geslicht und reserviert werden, und die kerckendienaer niet alletijt selvest van ihre kercken ofte jemant naer Aernhem senden konnen, und die brieven und supplicatien, die sij nu oversenden, langhsam expediert werden, soo ist raedtsaem und goet befunden, om die costen der kerckendienaer toe vermijden und effenswall tot die expeditie der kerckensaecken te geraecken, dat men bij der overheit aenholde, dat een seeckere persoen daertoe bestalt muchte werden, die tot Aernhem residere und alle kerckensaecken deses furstendoms und graeffschaps voor den Hoeve van Gelderlandt befondere und die resolutie den kercken weder toestelle, und dat dieselvige sijn jaerlix onderholt gelijk een ander kerckendienaer uijt den kerckengueder van elck quartier gegeven werde, tot welck officie der sijnodus op behaegen der overheit JACOBUM ELDENIUM genominiert heeft.

7. Wanneer een ouderlinck ofte diaconus, wettelick van den consistorio tot den dienst beroepen zijnde, und ghiene wettelicke oorsaecken hebbende, dat ampt niet aennemmen will, sall dat consistorium hem beroepen om redenen sijner weijgerongh aen te hooren und, soo hij alsdan voor den consistorio niet erschijnen will, sall hij, etliche maell door twee brueder vermaent sijnde, van den aventmaell een tijtlanck suspendiert werden.

8. Die naemen van dengeningen, die hem in den echtenstandt begeven willen, sullen van den dienaeren des woorts niet vercondiget werden, tzij dat beide persoenen ofte, soovern die niet kommen kunden, van bejide zijden guede getuijgen bij den kerkendienaer gecommen sindt, die gelooffweerdich getuijchnisse geven können, dat het houwelick wettelick contrahiert is.

9. Die echteluijden, die nae geholdene brulofft ofte bijslaepe ijrst begeeren uijtgeroepen und ingeseegent te werden ofte die tzaemen woenen und die uijtroepinge und insegonge voor die gemeente onderlaeten, sullen die ierste voor ihre insegononge van ire faute vermaent werden und ihre schult bekennen; und sooviell die andere angaet, sullen die kerckendienaer bij die magistraet aenholden, dat alsolcke ordenonge van innen in ihre steden niet geleden werde.

10. Alsoo viell echtsaecken in desen furstendomb und graeffschap voorfallen, daerin die dienaer der kercken niet resolvieren können ofte sullen, sall van wegen deses sijnode van der overicheit begeert werden, dat sij sommige geleerde und godtsvresende mannen daertoe committeren, die alle echtsaecken nae den woort Godes und keijserlijcken rechten richten und slichten.

11. Diewiell ogenschienlick is, dat oepentlicke lesterongh des naemens Goedes, ehebreckerije, hurerij, bloetschandt, vreten ende suepen und dergelijke sonde meer, in diesen landt sooseer overhandt genoemen hebben, dat men schier geen sonde daeraff en maect, daerdurch Gottes toorn over diese landen soo lenger soo meer ontsteken wirdt, und niet die geringhste oirsaeck ist, dat die tegenwoordige plaegen niet aff, maer meer und meer toenemen, soo heeft der sijnodus voor goet und raedtsaem bevonden, dat onse genedige heere stadtholder, cantzler und raeden und oock alle magistracten in den steden vermaent ende gebeden sullen werden, dat eine goede christelicke ordonantz gemaeckt, publiciert und executiert werde, dat ¹⁾ mit alsulcken groeven sunden sooviell moegelijk gewehret, der toorn Godes gestillet und daertegen Goedes seegen, geluck und heill aver dese landen gebracht werde, aengesien aller overheit ampt is beide taeffelen der geboeden Goedes te hanthaeven und toe beschermen.

Volgen die particularia.

1. Sall der wolgeboorne dr. graeff VAN DEN BERCH vermaent werden, dat sijne Genaede sijne onderdaenigen kercken laete reformiren und sich in

¹⁾ „dat“ T heeft „daer“.

der kerckenorderinghe den classe tot Zutphen bijfuege und dat die geistlicke beneficia, tot sijner Genaden collation staende, ghenen onduchtigen persoenen gegeven werden.

2. Aengaende die kercken Elst, Valburch und Lent, daer die reformatie ten deell aengevangen is, sullen die kerkendienaer van Nijmegen bij den amptman van Overbetuwe ¹⁾, ofte daer van noeden is, aenhalten, dat dieselve bij der angevangene reformation erhalten und gefordert werden.

3. Die consistorij tot Nijmegen sall bij den magistraet aldaer neers-tich aenholden, dat die aengefangene saeck van die schoell daer aen te richten geendiget werde und die magistraet sich verclaere, wat sij tot onderholt des rectoren und schoelmeesteren gegeven hebben und noch wijders geven willen, om daernaer die ordonnantie van die overige stipendie bij cantzler ende rhaeden te moegen bevorderen.

4. In die saeck D. JOANNIS à NIECKEN heeft der sijnodus die oirsaecken, daerom hij van der kercken van Duijsborgh tho trecken begert, erwogen und erkandt, dat hij der kercken van Duijsborgh noch ter tijt niet verobligiert is, maer om die itzige gelegenheit der kercken willen heeft der sijnodus voor goet aengesehen, dat D. JOANNES à NIECKEN noch een tijtlanck bij der kercken blijve und dat die kercke binnen een tijt van vier maenden mit D. JOANNE voerschreven handele, om hen te inducieren, dat hij bij haer toe blijven verwillijge und oock allen moegelicken vlijt aenwende, dat sie voor ihre dienaer gewis onderholt becommen, daertoe dan der sijnodus und classis allen moegelicken behulp doen sall.

5. Aengaende D. JOANNEM MILENDONCK van Wachtendonck tot Vendelo te transferiren, bevindt der sijnodus die oersaecken niet wichtich genoech om die kercke tot Wachtendonck van ihren beroepenen dienaer, den sij niet en begeeren te verlaeten, te priveren, maer sullen die ²⁾ Vendeloe alle middelen soecken van eenen anderen dienaer te becoemen, daertho die nabekercken innen behulplick sijn sullen.

6. Sal men ten Hoeve referiren, dat die Reformirte kercken tot Wachtendonck in groote gefahr ist umb wederom te vervallen uijt oorsaecken, dat der schultus aldaer van den gehor des woorts alsoock van den reinen bruck der sacramenten die luid affschrecket mit dreigementen unde alle

¹⁾ „Overbetuwe” T heeft „Overveluwe”. ²⁾ „die” T heeft „die van”.

goede ordenungh verhindert und etlicke eusterijen ondersleijt; derhalven te bidden, dat dat Hoff van Gelderlandt wulle een insehens hebben om solckes bequaemelick te remedieren, und om die kercken aldaer te erhalten, dat den kerckendienaer gemaect und gegeven werden; und angesehen die pastorie ¹⁾ van Wancken nu vaciert door het verloop van den gewesen pastor, nu tot Kempen residerende, dat men dieselve pastoriÿ conferire enen kerckendienaer mit naemen JOANNES KONNICHAVEN, welcker die pastoriÿ aldaer, tot Wachtendonck residerende, bedienen kan, dewiell die collation bij den Hoeve stehet.

7. Diewiell die kereke tot Graeff noch ghenen besunderen classen aenstellen kan und niet raedtsaem off erbaerlick is, dat sij alsoo voor sich selvest, sonder mit anderen genaberten kercken te communicieren, blieve sitten, ist voor goet aengesien, dat sij onder den classe tot Nijmegen sullen geacceptiert und gereeckent werden, ter tijt toe dat sij gelegenheit hebben sullen enen besunderen classen des landts van Cuick aen toe stellen, twelek der sijnodus aen der kercken tot Graeff schrieven und sie oere andtwoord der kercken tot Nijmegen wederom toeschicken sall.

8. Sooviell der echtscheidonge belanght, daer die vrouw den man verlaeten und sich tot einen anderen man begeven hadt, und der man een ander te trouwen begeert, laet der sijnodus blijven bij die resolutie des sijnodi tot Dordrecht anno LXXVIII 'int capittell van den houwlicken den XIII artijckell.

9. Insgelijcken oock van dengenigen, die eine maeght beslaepen heeft und niet tho ehe nemen will, referiren sij sich tot dat 86 artijckel in die particuliere bandelinghe des sijnodi tot Middelburgh, anno 81 gehalten.

10. Hiermit is dese handelonghe besloeten und der kercken tot Doesborgh operlaght tijt und plaetz toe nomineren, daer der naester sijnodus particularis op dat bequaemste und sonder gefahr sall moegen gehalten werden.

¹⁾ „pastorie” T heeft „kercke”.